

Zigorraren hiru laurdenak beteta dituzten bost lagun atxilotu dituzte

Donostiako Bulebarrean kateatu ziren, erabakia «neurri politikoa» dela salatzeko

Euren zigorraren hiru laurdenak beteta izan arren, atzo berriz ere atxilotu zituzten bost gipuzkoar. Entzutegi Nazionalak emana zuen bilatze eta atxilotze agindua duela hilabete inguru, eta eurek Donostiako Bulebarrean kateatuz salatu zuten neurri horren «izaera politikoa». Informazio hau idazteko orduan, Antiguako kuartelean zeuden oraindik.

Axun Erzibengoã / Donostia

DONOSTIAKO udaletxeko arkupeetan kateatu ziren lehenik, eta Bulebarrean geroago Madrilgo Entzutegi Nazionalak beraien aurka hartutako neurriaren «izaera politikoa» salatzeko. Bittor Valderramak, Joxean Inziartek, Rodolfo Cuestak, Txemi Urrak eta Juanxto Latasak bere garaian epaileek jarritako zigorraren erdia bete zuten (batzuk hiru urte eta besteek lau), eta, euren epaia errekurrituta zegoenez, aske utzi zituzten. 1995ean izan zen hori, eta, zigor kode zaharrek in espetxean dagoen edonori dagokion moduan erredentzio arruntak aplikatuz gero, guztiak espetxean egin zuten denbora kontuan hartuta beteta zituzten zigorraren hiru laurdenak.

Hala ere, epaien errekurtsioa Auzitegi Gorenean aztertu eta atzera bota ondoren, duela hila-bete inguru Entzutegi Nazionalak pertsona horiek berriz espetxeratzeko agindua eman zuen. Inola-ko erredentziorik gabe, espetxearen arabera guztiak urte bat eta bi urte bitartean egin behar dituzte oraindik espetxean. Beraien egoera berean zegoen Pako Gastesi joan den astean atxilotu eta kartzelaratu zuten.

Udaletxean kateatu aurretik prentsaurrekoa eskaini zuten bost preso ohiek, eta bertan argi utzi zuten beraiek espetxeratzeko arrazoia euren «militantzia politikoa» zela. Kaleratu zituztenetik bizimodu normala egin dutela azaldu zuten, baina harro agertu ziren, «euskal preso politikoa izango garelako». Sakabanaketa euskal presoek zigor gehitu bat dela adierazi zuten. Ildo beretik mintzatu zen Patxi Larrañaga AABetako kidea, eta argi eta garbi esan zuen bost pertsona horiek atxilotu eta espetxeratzeko agindua «neurri politikoa» izan dela.

Goizean dei egin zieten hedabi-



Bost preso ohietatik lau, atzo Bulebarrean kateatu ostean Ertzaintzak atxilotu zituen.

JAGOBA MANTEROLA

deei 12:45etan udaletxera joateko. Elkarren artean kateatuta agertu ziren, eta ateari kateatu zitzaizkion. Eskuetan pankarta

bat: 140 euskaldun bahitu, 90. artikulua orain. Zigorraren hiru laurdenak bete arren kartzelan segitzen dutenak oroitzen zituen.

Amaigabeko bi ordu

ESANDAKO orduan agertu ziren bostak, eta, iristen ari zirela udaltzainek ateak itxi zituztenez, arkupeetan kateatu ziren. Berehala hurbildu zen jendea haiengana; izan ere, une horretan amaitu zen udaletxe parean presoan alde eginiko gizakatea. Kateatutakoan erabakia txalotu, eta euskal presoek Euskal Herri-ratzea eskatuz oilu ugari egin zituzten han zirenek. Urduritasun uneak izan ziren jendearen agur eta musuen artean, Ertzaintza beraiek atxilotzera etorriko zelakoan. Lehenengo minutuak pasatuta, ordea,

giroa lasaitu egin zen, eta jendea joaten hasi zen 30 lagun inguru geratu arte.

Bero ikaragarria egiten zuen, eta ur botilak eskaini zizkieten kateatuei beraiei babesa emateko han gelditu zirenek. Denborak luze jo zuen, ordea, eta, txantxa batzuk egin zituzten arren, ordu eta erdi pasata erabakia hartu zuten: Bulebarrera joan ziren eta han kateatu ziren, beraien aurkako «ilegaltasuna» salatzeko. Bi ordu luze igaro ziren euren salaketa hasi eta Ertzaintzak atxilotuta eraman zituen arte.

Udaletxeko ateari kateatuta ordu eta erdi baino gehiago igaro ostean, ateari lotuta zituzten kateak askatu eta Bulebarreraino joan ziren. Han kalearen alde batetik bestera kateatu ziren, semaforotik semaforora lehengo pankarta eskuetan zutela. Beraiei sustengua emateko 30 lagun inguru zeuden, eta haiek ere bost lagun horien atzean jarri ziren, *Euskal presoak Euskal Herria* oihukatuz. Bost minutu pasatu baino lehen agertu ziren Ertzaintzaren bi furgoneta, eta, jendea albo batera bidali ostean, semaforoetara lotuta zeuden kateak apurtu zituzten. Ondoren bost preso ohiek zuten pankarta lurrera bota eta furgoneta barrura sartu zituzten jarrita zituzten kateak batere askatu ere egin gabe. 14:50 aldera alde egin zuen furgonetak bost atxilotuekin jendearen oihu artean. X

AABek torturen lekukotasunak eman dizkiote Ricardo Blazquez apezpikuari

■ Euskal presoek senideak Bizkaiko apezpikuarekin bildu dira Begoñan

Iñaki Uriarte / Bilbo

TORTURAREN aurkako kanpaina bideratzen ari diren preso batzuen senideak eta AABak Ricardo Blazquez Bizkaiko apezpikuarekin bildu ziren atzo eguerdian Begoñako basilikan.

Hogei bat minutuz aritu ziren bileran, eta Nerea Pedrosak eta Borja Sarrionaindiak AABek urte hasieratik eta maiatzera arte bildutako tortura eta tratatu txarren kasuen dosierra helarazi zioten.

Nerea Pedrosak haren ahizpa Maite Pedrosa Guardia Zibilak atxilotua zuten bitartean alutik eta ipurditik eskuz eta pistola batez bortxatu egin zuela salatu zuen. Cristina Getek ere antzeko tratua pairatu zuela salatu zuen haren aitak, Jesus Getek. Irain sexualak gain jipoiak, itolarria eragiten zuten plastikozko boltsa buruan eta beste tratatu txar batzuk pairatu zituztela salatu zuten. Horiek dira AABek urtea

hasi eta maiatzera arte bildu zituzten tratatu txarren 83 kasuetako bi.

Atzoko bileran, Sarrionaindiak eta Pedrosak idatziz eman zioten Blazquezi lekukotasunen bilduma, eta hark konpromezua hartu zuen atxilotetak daudenean atxilotuen egoeraz interesatzeko.

Torturaren inguruan eginiko elkarrizketen kontestuan egin zuten bilera. Tortura desagertarazteko inkomunikazioa bertan behera uztea, atxilotuak epaile naturalen esku geratzea eta torturak epaitegietan salatzen direnean prozedura arinak izatea eskatzen duen lege proiektu hitzartu bat bideratu nahi dute. X

Atxilotuei eragindako biolentzia sexista salatu du Egizan-ek

■ Emakumeen tratatu txarrez iritzia eman dezaten eskatu die alderdiei

Iñaki Uriarte / Bilbo

EMAKUMEEK Poliziaren esku pairatu izan dituzten tratatu txar eta bortxaketak salatu zituen Egizan elkarteak. Maite Pedrosa eta Cristina Gete Guardia Zibilaren esku hainbat aldiz izan dira umiliatuak eta bortxatuak, adierazi zuten Bilbon eskaintako prentsaurrekoan. «Euskal Herriaren eraikuntzan aritu diren emakumeak Estatu Espainolak betidanik edozein zioarekin torturatu, bortxatu eta erail ditu biolentzia sexista erabiliz eta Estatuaren bitarteko guztiak inplikatu», gaineratu zuten Egizan-eko kideek.

Egizan-eko ordezkariak oso larritzat jo zuten Rita M. emakume brasildarra bortxatua izan zela frogatu eta erasotzaileak «inpunitate osoz» atzeratzea. Egizan-ek dei egin zien tratatu txarren aurka agertu ziren alderdi politiko eta gizarte erakundeei beraien iritzia eman dezaten komisarrietan emakumeek salatutako tratatu txar eta bortxaketen aurrean. X

Aske utzi dituzte Poliziak Zumaian atxilotu zituen bi lagunak

Erredakzioa / Donostia

BEHIN-BEHINEKO askatasunean utzi zituen atzo Entzutegi Nazionalako epaile Javier Gomez de Liañok joan den asteazkenean Espainiako Poliziak Zumaian atxilotu zuten Iñigo Eguiguren eta Nerea Epelde bikotea.

Epaileak hala erabakita, Eguigurenek hilabetean behin epailearen aurrean agertu beharko du, eta Epeldek astean behin. Batak zein besteak ukatu egin zituzten epailearen aurrean Espainiako Poliziak egozten dizkien karguak.

Bestalde, atzo aske geratzeko zen Jose Gorostiza Salazar, Espainiako Poliziak maiatzaren 27an Bizkaian eta Gipuzkoan eginiko operazioaren testuinguruan Benidormen atxilotu zuen 67 urteko gizona. Gorostiza Mediterraneoko kostaldean zegoen tronbosi batetik osatzen. Baltasar Garzon epaileak fidantzapeko askatasunean utzi zuen, milioi bat pezeta ordaindu ondoren. Bost egun inkomunikatuta eman eta ofiziozko abokatua eragin deklaratu ondoren, Soto del Realeko kartzelan sartu zuten. Ongi etorria egingo diote Santutxun. X

Radio France Pays Basque Irratiak langile elebidun bat xekatzan du euskarazko sailean ordezkaketen egiteko.

Uztailaren 14 aintzin igor zuen gutuna (euskaraz eta frantsesez) eta CVA helbide huntarat:

RADIO FRANCE PAYS BASQUE - 20, Orbe karrika
64100 BAIJONA